

COMUNICATO n. 1822 del 01/07/2025

Augelekk di gara. Fugatti: a prodjèkt pittnàndar pinn lentar zo pezzra in provintziàl bege 133

Bege von Laaz gètt in apalto dar naüge tunnel. Arbatn vor 8,5 mildjü

[Cimbroy] 'Z provintziàl Àmt vor di apalte un di kontrètt hatt augelekk di gara zo: "pezzra un betra in provintziàl bege n. 133 von Laaz – toal 1" (arbat S-136 vodar Provìntz), khött o Kaiserjägerstrasse, di vüarom asó geat vür untarzolega gèlt. "An arbat boda sichart ke di Provìntz bill gian vürsnen zo pezzra disan bichtegen bege boda pintet di Valsugàna pittar Zimbar hoachebene, pittar sèlln vo Slege un pinn Veneto, pittnàndar pinn vüarom von Kamöünder un pinn lentar – khütta dar Fugatti – a bege boda iz bichte vor di laüt bodada lem ma boda hatt an groazan turistik un spotif vèrt o, gesek ke 'z iz gest ummadar von beng gemacht von Giro d'Italia 2022. Da naüge arbat, est gelekk a gara, bart sichar machan in bege mearar sichar ma in da gelaichege zait bart haltn in gântzan in storege vèrt un di auzseng un asó barta nèt khemmen mindar dar turistik interesse von provintziàl bege n. 133. Ma saitze gelekk dakòrdo pinn Kamöünder zo macha an uantzegen tunnel zo giana in nidar un anvétze in khemman auvabart khemmenda gehaltet di zboa stòregen stöll bodada soin zo viazara in an unatzegen senso, asó bartma mang viazarn desträr übarhaup balda iz dar mearaste trafiko".

Disa naüge arbat geat vür pinn sèlln arbatn boda sa soin khent gemacht sin haüt un ágeheft no in di djar '90 zo richa in provintziàl bege 133. Di lestn arbatn soinse gemacht verte 'z djar 2023 pitt disan hattma geredegart un gebetart in tòkko zbisnenen in km 6,6 un in km 6,8 (arbat S-891). Dena soinse gevuntet dar vorsitar vodar Provìntz un di pürgermaistarn vo Folgrait, Lavròu, Lusérn, Kalnètsch, Leve un Plaif pittnàndar pinn provintziàln tèknege, un izta auzkhent zo pezzra in bege haltante di stöll bodada soin un zo nützase lai in gianan aubart, machante, anvétze an tunnel zo giana in nidar.

Di arbat gelekk in apalto vor in earst toal lekk vür herzorichta khlummane tökkla boda soin drä nidarzorütscha un zo betra drai khearn perikolosat. Dar bichtegarste toal von prodjèkt iz khött "Intervento C", un iz betarn aftz obar abenemmante in kròtz un atz ándre saitn betrante untar machante au a maur postart aftz mikro säüln. Pinn zil zo halta daz mearste boma mage in stòrege tòkko, zbisnen in zboa stöll bodada soin est, barta nicht khemmen getánt vo groazez un barta soin an uantzega korsia lai in aubart bait 2,5 mètre un an ránt auzzalt vo 1,15 mètre, obar zuar in pèrge barta o soin a ránt betar odar engar boda geat auz ná in krotz. An lestn izta di arbat gehaolt "Intervento G", boda vürlekk zo macha an naturàl tunnel pittnar uantzegen korsia lai in nidarbart lāng 255 mètre. Drinn barta soin a korsia bait mearar baz drai mètre un zboa rent auz ná. In emerdjéntz bartz soin asó möglich azta mang pasàrn zboa meze saiz in nidar saiz in au.

Dar prodjèkt iz khent gemacht von inzenàr Paolo Nicolussi Paolaz, von Dianst vor di beng un aisanpàn vodar Provìntz, dar vorbörtlich vodar arbat, anvétze, iz dar inzenàr Carlo Benigni. In gântzan di arbat bart khemmen zo khosta vor in toal 1, 8.583.500 euro, vo disan 235.500 euro vor di siacharhait. 'Z gèlt hintargehaltet vodar vüarom azta berat eppaz boda nèt geat un vor ándarst iz 3.226.100 euro. Di zait vürgelekk zo macha verte di arbatn iz vo 560 tang.

'Z Amt Apac hatt auzgètt in telematesche auszschreibung pinn kriterio berda inngitt daz bōlvraſte afte plattform Contracta atz 30 von prachant 2025. Dar lest tage innzogeſa di opfarn iz gevestet vor di 12:00 von 2 von herbeſtmånat 2025. Dar earſt ſetz gara bartze haltn atz 3 von hebeſtmånat 2025.

Übarſetzt von Schaltarle vor di zung von Toalkamou vodar Zimbar Hoachebene

(cdt)